

Govor članice Delegacije Parlamentarne skupštine Bosne i Hercegovine u Parlamentarnoj skupštini Vijeća Evrope (PSVE) Milice Marković na prvom dijelu redovnog zasjedanja PSVE tokom rasprave o poštivanju obaveza i angažmana Bosne i Hercegovine kao države članice Vijeća Evrope

Strazbur, 24. januar 2018.

"Gospodine predsjedniče, drage kolege,

Prije svega, želim reći da su izvjestioci učinili veliki napor kako bi napisali ovaj izvještaj o BiH, tim više što se radi o državi koja je veoma složena i specifična po svojoj političkoj strukturi.

Znam da je svakom strancu veoma često teško shvatiti poziciju BH, njen ustroj i političku i demografsku strukturu, a posebno funkcionisanje ili nefunkcionisanje njenih institucija. Iako je izvještaj poprilično obiman, moram reći da ima segmenata u kojima se vidi da izvjestioci nisu shvatili dobro svu situaciju, naročito političku. Krenimo redom ...

U više paragrafa izvještaja, vi ste zaključili da je politička situacija u BiH teška i za te probleme ste optužili jedan dio BiH: Republiku Srpsku. Zaključili ste da je 20 godina nakon rata BiH i dalje duboko poidijeljena na etničkim osnovama i da nema nikakvu zajedničku viziju budućnosti. I još ste nabrojali nekoliko problema i prepreka u BiH. Izostavili ste da navedete prave razloge za tu situaciju i da kažete da je BiH do sada iscrpila svu svoju snagu kako bi postala zemlja po mjeri svih njenih građana. Propustili ste reći da je sva priča oko članstva BiH u NATO, njenog euroatlantskog puta nategnuta i da se BiH danas guši u mnogobrojnim problemima, kako političkim tako i svakodnevnim problemima ljudi. Prema vama, jedan od najvećih problema koji danas ima BiH je datum kada se proslavlja Dan Republike Srpske „9. januar“. Naveli ste da je neprihvatljivo da Republika Srpska slavi svoj dan iako je on utemeljen na članu 3. Zakona RS-a o praznicima. Propustili ste reći da BiH nema zakon o praznicima jer nije postojao dogovor o formi takvog zakona na nivou BiH.

Treba reći da su danas najveći i glavni problemi BiH sljedeći:

- nefunkcionisanje pravosudnih institucija na nivou države: Sud BiH, Tužilaštvo i Ustavni sud. U Sudu BiH ima sudija koji se terete za ratne zločine ali koji donose presude i sudske odluke i oslobađaju one za koje postoje dokazi da su počinili ratne zločine nad Srbima. Zahtjev Republike Srpske da treba suspendovati sve sudije za koje postoje dokazi za ratne zločine bez disciplinske procedure ali sa dvostrećinskom većinom u parlamentu, za vas izvjestioce je neprihvatljivo.

Ustavni sud BiH čini 9 sudija: 2 Bošnjaka, 2 Hrvata, 2 Srba i 3 stranca. Vi smatrate neprihvatljivim zahtjev Republike Srpske da se usvoji zakon o Ustavnom sudu BiH koji bi definisao taj sud kao sudsku instituciju sastavljenu od domaćih sudija. Šta reći na to?

- Jedan od najkraćih paragrafa u vašem izvještaju je posvećen borbi protiv terorizma. I vi ste sami rekli da se u nekoliko prethodnih godina desilo više izolovanih terorističkih napada u BiH: eksplozije bombi na javnim mjestima, napad na Ambasadu Sjedinjenih Država i drugi napadi. Zaključili ste da postoji vehabijska zajednica, da je ostalo još oko 1500 mudžahedina, paravojnih boraca porijeklom uglavnom sa Bliskog istoka i sjevera Afrike i koji su se borili tokom rata u BiH. Zbog tih činjenica, sigurnost građana u BiH je danas veliki problem. To je druga prepreka razvoju BiH.

Moram reći da ste pomiješali nadležnosti raznih nivoa vlasti. Na primjer: sugerišete da obrazovanje mora biti integrisano u BiH a ignorišete činjenicu da je obrazovanje isključiva nadležnost entiteta.

Kao zaključak moram reći da niste u pravu kada optužujete samo jedan dio BiH za sve probleme. Jedan dio od tri moguća dijela ne može ni prouzrokovati ni riješiti probleme. Ali taj dio koji vi optužujete, Republika Srpska i njen predsjednik Milorad Dodik žele da u BiH stvari idu naprijed jer oni smatraju da BiH pripada takođe i Srbima kao i Bošnjacima i Hrvatima i ostalima.

Hvala na pažnji."

